

di Maria Sale

SABIENTZIA - CAPITULU 16

Sigundu contrapassu: sas ranas

1) Pro custu sun istados giustamente punidos cun esseres similes e turmentados dae meda animaleddos.

2) Invetze de tale castigu, tue as beneficiadu su populu tou, pro nd'appagare s'apetitu mannu lis as preparadu unu mandigu bonu e savoridu, sas cuaglias.

3) Sos egizianos, difatis, mancari abbramidos de mandigu, disgustados dae sos animales imbiados contr'a issos, perdein fintzas su naturale appetitu, custos invetze , pustis de paga privassione, an assaboriadu unu mandigu savoridu.

4) Fit netzessariu chi a-i cussos inimigos lis èsseret bennida addossu una carestia manna e chi a-i custos s'èsseret mustradu solu comente fin turmentados sos inimigos insoro.

Tertzu contrapassu: tzilipisches e coloras de brunzu

5) Cando los at assaltados sa terribile ira de sos animales e sun mortos dae sos mossos de sos serpentes, s'ira tua no est durada fintzas a sa fine.

6) Pro curregimentu sun istados assuconados pro unu pagu tempus, apende gia apidu in pignu sa salvesa pro lis ammentare sos decretos de sa legge tua.

7) Difatis, chie si 'oltaiat a l'abbaidare fit salvu, non pro su chi 'idiat, ma solu dae a tie, salvadore de totu.

8) Fintzas cun cussu as cunvintu sos inimigos nostros chi tue ses su chi liberat dae donzi male.

9) Sos egitzianos, difatis, sun mortos dae sos mossos de tzipilisches e de muscas, ne s'agateit unu rimediu pro sa vida insoro, meritendesi de essere punidos in cussa manera.

10) Invetze contras a sos fizos tuos mancu sas dentes de serpentes velenosos an potidu nudda, ca est intervennida sa misericordia tua a los sanare.

11) Pro chi s'ammenteren de sas peraulas tuas, lantados dae sos mossos, fin luego sanos, pro timòria chi, ruttos in profundu olvidu, ch'esseren istados fora dae sos benefitzios tuos.

12) No los saneit ne un'erva ne un'unghentu, ma sa peraula tua, o Signore, sa cale sanat donzi cosa.

13) Tue, difatis, as podere subra sa vida e subra sa morte, che faghes falare in fundu fintzas a sas giannas de sos inferos e nde faghes torrare a pigare a subra.

14) S'omine podet bocchire in sa malvagidade sua, ma no podet faghene torrare un'ispiridu già esaladu, ne liberare un'anima già aggolta in sos inferos.

Cuartu contrapassu: su randine e su mannà

15) Fuire a sa manu tua est impossibile:

16) sos malos, chi rifiutan de ti conoschere, sun istados colpidos cun sa fortza de su bratzu tou, pessighidos dae istranas abbas e randine, dae irridos bundantes e mandigados dae su fogu.

17) E cosa pius istrana, s'abba chi totu istudat acchicat de piùsu su fogu: s'universu si faghet alleadu de sos giustos.

18) A bortas sa fiama s'abbasciaiat pro brujare sos animales imbiados contras de sos malos e pro lis fagher cumprendere bidentelu chi fin pessighidos dae su giudisciu de Deus.

19) Ateras bortas fintzas in mesu s'abba sa fiama brijaiait pius potente de su fogu pro destruere sos rebuddos de una terra ingiusta.

20) Invetze as passadu su fame a su populu tou cun-d'unu mandigu de sos anghelos, dae chelu as offertu a issos unu pane già pruntu chena fadiga, capatze de dare 'onzi delissia e suddisfaghene 'onzi gustu.

21) Cust'alimentu tou mustraiait sa dulchesa chi as pro fizes tuos, issu s'adattaiait a su gustu de chie l'ingugliait e si mudaiat in su chi donzunu disizaiat.

22) Nie e astrau aguantaian a su fogu chena s'isolvere, pro chi esseren connotu chi su fogu distruiait sos frutos de sos inimigos atzendendesi in mesu su randine e brujende sutta s'abba pioana.

23) A s'imbesse, pro chi s'esseren alimentados sos giustos, s'irmentigaiat fintzas de sas virtudes suas.

24) Sa creassione, difatis, ponzende mente a tie creadore, s'arrempellat pro punire sos ingiustos, ma s'addulchit in profetu de sos chi in tegus an fide.

25) Pro custu fintzas tando, adattendesi a totu, serviat a sa voluntade tua chi dat alimentos a totu, sigundu su disizu de chie nd'at bisonzu,

26) ca sos fizos tuos chi amas, o Signore, esseren cumpresu chi no sun sas tantas calidades de fruttures chi alimentan s'omine, ma sa peraula tua bardat sos chi in tegus creèn.

27) su chi difatis no fit istadu distrutu dae su fogu, s'isolviat puntu iscaldidu da unu raju de sole,

28) pro chi s'esseret ischidu chi si devet bidere su sole pro ti torrare grascias e pregaredi cando ispuntat sa lughe

29) Ca s'ispera de s'ingratu s'at a isolvere che lentore ierritzu e s'at a isperdere che abba chi no balet a nudda.

